

重修兩淮鹽法志

兩淮鹽法志卷九十

督銷門

整理汝岸

淮北引鹽行銷豫省十四州縣自捻匪擾亂廢棄已久至光緒五年兩江咨請河南巡撫查禁鄰私守令視為具文衛鹽侵占如故迨至光緒十一年鹽政曾國荃始頒自運公運之法加籌津貼新蔡汝南埠翰棟等處暢銷十之七八而成效可覩蓋數十年之廢岸整理若斯之難也爰採新章俾後人推廣行焉志整理汝岸

光緒五年六月河南巡撫涂宗瀛示准兩江督鹽部堂沈

咨開據淮北督銷委員稟據豫販公請查禁汝屬鄰私
歸復引地並嚴禁浮費等情咨請重申禁令嚴加整頓
俾地方鹽務兩有裨益等因查此案前據督銷正陽委
員稟據豫販程全興等稟稱汝甯府汝陽縣等處又有
私設鹽行按月納規及需索錢文藉詞修寨並該三縣
文武各衙門私取銷票行規及抽收賣鹽客釐當經批
飭糧鹽道轉行汝府分飭各該縣查禁在案查豫省各
局卡抽收鹽釐前經本部院嚴定章程一切浮費概行
禁止爲時未久何以汝陽等處又有需索情事殊屬贍
玩除嚴密訪查外合行出示嚴禁爲此示仰汝陽上蔡

新蔡等縣商民人等一體知悉嗣後儻有不肖之徒仍
前賄引私販越境圖利並跌價搶售以及各文武衙門
仍敢私收規費抽取客釐定行嚴究決不稍寬再商販
亦當奉公守法經過官設卡局照章納釐不得因本部
院一再示禁輒行驕抗藉滋事端自取咎戾各宜懔遵
光緒十一年正月正陽督銷局道員徐文達詳查汝甯府
汝陽縣淮鹽棧伍泰來等稟稱向在汝洪二河販運票
鹽爲生自兵燹以來河道壅塞身等寄住汝郡東關迨
後捻匪平定河路疏通身等在汝邑請示開設淮運官
棧代客售賣有引票鹽有年矣自同治年間有許陳二

州郡所管之淮甯商水沈邱項城西華郾城舞陽各縣
衛商屢起覬覦之心數爲蠶食已於鄭封交界設立分
銷鹽店屢次勾引汝民販賣伊鹽孰知梟毒包藏禍心
得望蜀四鄉各集發售心尚不足詎西華縣衛商黃
金橋王立齋由西華管之新集係上蔡之交界設立分
店運鹽至汝東關於本年十月開立三義號衛鹽店身
等查光緒五年蒙河南撫帥涂出示禁止各私各復引
岸越境搶售定行從嚴究治有案可查屢稟前任縣尊
出示查拏淮運仍復暢銷未隔歲餘禍心復萌各處私
梟復蹈故轍蜂擁而來自光緒七年淮鹽斷止並無絲

毫之鹽入汝地四年以來各棧窖守以待斂前任縣尊
示諭每月三報時估官價之累而南北兩道尚有查札
例差之患三報官價虛耽其名查札之患按名攤支身
等無奈投明地保查驗衛鹽一百二十包計重一萬八
千餘斤並有領東首犯彭玉文身等以違例越境稟明
在案不料縣尊不以定例爲法視爲具文批示身等所
稟是否私鹽抑係官鹽並各該鹽棧見存官鹽實有若
干著東關橋西首事查明稟覆核辦不意首事常起鵬
稱若無官鹽稟明縣主押追身等畏法不敢理較恐遭

賄朦嚴押之患伏叩賞准轉請兩江督鹽部堂速飭淮
運至汝邑接濟民食以免身等嚴押之患等情除批案
查汝甯九屬均係淮鹽引岸經豫撫部院涂嚴禁販私
跌價搶售並裁革浮費汝陽縣令何以官私莫辨該處
首事常起鵬等復受衛私重賄硬飭地保反行追追俾
該官鹽棧不能安處儘可赴豫省上司衙門具控諒必
均以裕課恤商爲念轉飭各屬恪遵定例嚴禁私鹽以
暢官引地方劣紳必然斂迹何必奔控來關求免追押
候鈔稟咨請汝光道汝甯府查究責成汝陽縣官紳人
等毋得以私害公外職道當飭公所委員傅伍泰來等

照前販運汝河並飭各豫販運銷僉稱汝河冬寒水涸
舟運不通兼以衛鹽堆積價賤色高難以抵敵該處民
情舍貴趨賤淮鹽成本運腳俱重不能賤價兼不行銷
伏思汝甯九屬上蔡遂平西平確山四屬均食衛私汝
陽正陽新蔡三屬亦食衛私淮鹽莫敵見經衛商開設
三義店勢必侵溢若不設法整頓信陽羅山及光固一
帶暢岸難保無虞職道疑前顧後焦慮萬狀銷路日侵
於鹾務大有關礙經鹽政曾國荃據稟移咨河南巡撫
鹿傳霖旋准咨覆河南汝寧縣淮鹽棧伍泰來等稟衛
商越境開店公懇急究等情一案飭卽查明衛商是否

在東關開立鹽店先行稟覆茲據汝甯府李德洞覆稱
據署汝陽縣知縣秦令會委員稟查汝陽係淮鹽引岸
向由民人販運並無專商因淮鹽至汝路遠本重每有
脫檔之時甚有一年並未一到民間淡食堪虞往往向
鄰封買食衛鹽而衛私亦不無侵灌積習相沿已非一
日光緒十年八月間衛商黃金橋鋪夥王立齋彭玉文
因向淮販伍泰來等索欠錢文在縣興訟嗣彭玉文在
東關開設三義字號售賣木炭伍泰來等卽以王立齋
等販賣私鹽控縣批飭東關首事查復旋於十二月間
彭玉文將號收閉見查衛商並無在東關開設鹽店情

事卽前次在縣涉訟亦無將伍泰來等差傳押追具稟
前來卑府覆查衛商鋪夥彭玉文前在東關開設三義
字號旋卽收閉見在衛商委無開設鹽店越境售私情
事惟查卑府九屬淮販經年不至非特民間有淡食之
虞尤恐鄰私多浸灌之弊除由卑府飭屬設法查禁外
理合據實稟請查核迅賜咨明兩江督憲飭催淮販趕
緊運鹽前來以廣銷路以杜私充

光緒十一年八月淮北督銷局道員徐文達稟奉札飭准
前河南撫部院鹿咨覆汝甯各屬經李守查禁見在衛
商委無開設鹽店越境售私事情民間淡食堪虞飭催

淮販趕運汝岸以免脫誤而杜私充等因職道遵卽通飭各販趕運奈汝甯棧販伍泰來裴興盛等購運無多數月僅三千餘包分岸銷售恐難接濟於六月杪飭派提調知府楊觀辰酌帶隨員督率湖販於到關之鹽酌運七千餘包赴汝試銷商請地方官查禁衛私逕稟護理河南撫部院孫諭飭汝屬文武汛官極力查辦以保課餉在案茲據楊守稟稱遵飭押運赴汝行至河南之往流集上駛入大洪河水勢漸淺重載難往節節起駁行抵新蔡查該處汝洪二水相匯衛私每由小洪河出口上至汝南埠等處下往烏龍集一帶侵往暢岸此處

爲入首要津由汝河以上如汝南埠翰棟等處鄰於暢
岸悉關緊要復抵汝甯與李守相商當卽通飭各屬出
示查禁卑府遵將運銷之鹽提運二千餘包至府城分
撥二千包至汝南埠留三千包駐新蔡發售備撥惟查
處處衛私囤積訪聞運至府城貴則每斤五六十文不
等常價約四十餘文淮鹽到汝擬定官價每斤四十四
文此係商民兩便奈私販見淮鹽到岸陡跌至三十三
文暫時相敵見由上蔡之東洪橋等處七十里陸路運
汝絡繹不絕卑府查衛私入汝之由先在伊之引地與
淮岸相近之處設局囤聚如余店距楊埠十八里河段

橋距寺耳埠十八里渡小洪河便入淮引食岸他如新莊趙五溝營磚橋等處距上蔡之東西洪橋均有四五十里之遙陸路直達汝甯各屬若欲規復廢岸必需步隊駐劄上蔡之東洪橋等處分撥哨隊駐守楊埠寺耳埠兩處一律堵緝並沿小洪河水渡口梭巡衛私既止淮引自行此係第一關鍵也至於保全暢岸須在新蔡之汝洪河口駐劄破船數隻查禁小洪河出口船私兼在汝河梭巡以防陸路偷渡先固暢岸藩籬在該處設局緝私招商分銷會同地方官查禁衛私兼杜奸販影射諸弊淮引運銷無論多少得步進步此則第二關鍵

也查淮鹽到岸難銷不往則該處官民藉口前年官運
退回衛商開店府城私鹽侵至光息一蹶幾不能振若
再不加整頓暢岸難保職道伏查淮北鹽引行銷豫省
十四州縣除光光固息商五屬外卽汝屬之信陽羅山
均稱暢岸其餘汝甯七屬惟新蔡正陽汝陽間有淮鹽
運往甚不行銷西上確遂四縣廢弛已久根查衛私來
源多由上蔡入境先以陸運侵銷汝屬次由下洪河上
駛汝水漸入暢岸若不設法堵緝伊於胡底惟由上蔡
陸路堵緝必需步隊駐劄各要道嚴密梭巡該處道途
平坦衛鹽價值不等民情含貴趨賤小洪河窄一葦可

杭頭頭是道防不勝防緝私經費需欵亦多在在不易
職道一再籌思不如先由新蔡之小洪河口設立緝私
局請撥礮船四號攔堵水道押巡汝河上下堵緝私鹽
渡汝先保暢岸再飭汝販伍泰來等源源來關辦運接
濟民食以期得步進步際此時勢多艱上因課額奏限
難支下恤商情資本宜固自不容不極力整頓設法疏
銷經鹽政曾國荃批據稟汝屬衛私每由洪河上駛侵
入暢岸擬在新蔡之小洪河口設立緝私局攔堵水道
押巡汝河上下以杜衛私渡汝係爲力保藩籬起見應
准照辦仰卽揀派妥員前往駐劄會同該處地方文武

認真巡邏期收實效所需勇糧薪資每月共需一百九
十餘兩准在鹽釐項下開支塘捐應俟塘工報竣卽行
停止以輕商本至請撥船四號查恪靖親軍水師巡緝
前營前飭分撥協緝考私見在文闡已畢武闡過船較
少並候札飭陳鎮能伸酌撥四號馳赴正陽驅候該道
節制調往並咨河南撫部院頒示通飭

光緒十一年十一月淮北督銷局道員徐文達稟於六月
初間因查伍泰來等來關購運無多深恐不敷接濟復
派提調楊守觀辰酌帶員弁督率湖販於到關之鹽撥
運七千二百餘包每包公議在塘捐項下酌給津貼錢

二百文先行試銷嗣接提調楊守函稱前運之鹽七千
餘包分撥汝甯府汝南埠新蔡三處一再商請地方守
令出示查禁衛私見在汝南埠已陸續行銷府城新蔡
兩處亦均開售惟距正陽水道七百餘里河水日涸此
時運鹽已須節節提駁若交冬令水淺沙淤尤易冰凍
轉運更難一經脫誤則地方紳民有以藉口私梟更必
乘虛而入必得及早多籌接濟以備冬季銷市又連接
府縣函牘催運鹽斤職道察度情形辦理旣稍有成效
自當趁此機會竭力整頓緝私固所必須而籌鹽濟運
尤爲要義除於九月初七日又飭各湖販撥鹽四千三

百餘包仍照頭批章程每包酌給津貼錢二百文派員
星夜運往接濟外連日督同眾販集議持久之策據郭
大順等四十八戶稟稱販等公議祇有在正陽設一籌
濟公所分爲自運公運兩法由販等公舉董事數人經
理籌鹽接濟各事又於汝南埠銷鹽適中之區設一儲
鹽總棧亦酌派一二公正董事常川駐彼專司售鹽事
宜兩處均由總局遴員各一人督同經理隨時察看盈
虛源源接濟總期前無擁擠後無脫誤此後凡須運鹽
之時湖販到關之鹽有願自運前往者卽至公所報明
或原船上駛或另雇船裝運開明清單由公所轉請總

局給發護照按批起運不減釐金不給津貼仍由總局飭知新蔡緝私局俟該販運抵汝岸照數點驗分撥各處挨輪板價售銷不准爭先落後以杜沿途灑賣並跌價搶售情弊此自運之一法也其有不願自運者卽由公所委董公同取樣照正陽售鹽牌價估定價值雇船過載由總局酌借水腳分批派人押送至汝仍由新蔡查驗後交與儲鹽總棧分撥銷售仍按照該販在關守輪挨售之日如運去之鹽業已銷竣卽將原銀照估價發還該販扣還水腳盈絀概歸公所與原販無涉如挨輪之日鹽未銷竣便由公所呈請總局設法籌墊不逾

挨售日期以昭公允該販旣免守輪之費又無盜賣淌
銷之虞誠屬有益無損均各樂從此公運之一法也惟
開辦之初兩處公所總棧在在需費擬請將此後一分
塘捐改作籌濟汝岸經費暫資應用等情職道通盤籌
畫亦惟照所稟辦理最爲合宜卽經批飭於九月十三
日開辦並諭令各販董務於九十月內分批籌鹽三萬
餘包以備冬季銷市毋得脫誤至於塘工一分銀兩本
屬無多如前路暢消守輪期速所費甚微獲益甚大自
應准如所請自十月初一日起卽將此項一分經費改
歸公所照收經鹽政會國荃批查汝甯七屬屢經整頓

迄無成效經該道稟請河南撫部院飭屬嚴禁衛私先行撥鹽試銷復在新蔡之小洪河口設卡緝私准引漸見疏通見擬自運公運兩法作持久之計無論官販均不減釐金不給津貼自無占銷暢岸之慮仰卽如稟試辦三箇月再行定案未盡事宜准由該道隨時斟酌續稟核示所用委員人等必須詳慎揀選開單稟報兩處旣設公所總棧自必需費准將塘工一分改歸公所照收務將應支之款逐一稟定按月報銷並將出運到棧鹽數按旬具報以昭核實而重稽考

光緒十二年三月淮北督銷局道員徐文達稟自新蔡設

局之後關上輪鹽銷數較旺查正陽近年銷數有減無增至十年分連閏十三箇月僅銷六十八萬餘包獨去
年銷去七十餘萬有奇運汝之三萬七千餘包尙不在
內足證新蔡設局緝私有益於暢岸之明驗也職道伏
思數十年廢岸迭次興辦未成之事況當此課納商困
經費無出更何能作此無米之炊但念淮北銷數日疲
鄰私侵灌日甚一日商販半多歇業疊蒙憲臺咨請河
南撫部院飭屬查禁衛私地方官亦能和衷相助暢岸
藩籬既固是應趁此一縷轉機增募陸勇分頭堵劄思
爲得步進步之計惟勇少則與事無濟多則經費難籌

湖販旣已提捐一分不能再令加捐輒轉籌思西壩票
販與湖販本互相表裏銷暢同受其益銷滯均受其困
此時整頓汝岸爲大局起見理應通力合作庶昭公允
是以咨商海分司曉諭利害勸令每包照捐銀一分以
作添勇經費如果樂從再會稟憲臺批示遵行迨至正
月杪接海分司稟覆票販人心不齊未允捐輸無可如
何幸此間各湖販聯名一再稟請於到關之鹽情願每
包再捐一分以期推廣緝私共維大局職道通盤籌畫
明知湖販近年獲利甚微此次所稟原是激於義憤然
事之成敗在此一舉斷不可再失機宜祇得准如所請

自二月初一日起上卡之鹽多捐一分連前共銀二分
約計每年可得一萬四五千金除公所及總分各機薪
糧雜用等項外所餘約有五六千金隨卽添募馬隊三
十名步勇一百名派委汪哨弁帶往新蔡由緝私局楊
守節制見聞邊中丞莅位以來整飭吏治據汝甯李守
等面稱正月晉省拜年奉諭衛私無釐無課限三箇月
退清亟應嚴禁以暢淮鹽官引等諭應請憲臺再加一
函以昭懇摯於事格外得濟再汝甯府李守德洞深資
幫助汝甯營參將玉壽亦能隨事關照見在地方官紳
漸見聯絡客主既能融洽遇事庶免掣肘該二員見辦

汝屬保甲尤爲文武表率呼應較靈擬請憲臺會同豫撫憲會札委飭該二員查禁汝屬衛私事務每員每月給夫馬公費曹平銀五十兩由新蔡緝私局楊守處按月支領將來仍在販捐經費內開報經鹽政曾國荃批示汝岸自小洪河口設卡緝私水路已有防範而上蔡之東西洪橋以及寺耳埠等處又皆鄰近衛私尙須募勇嚴防旱道以固門戶各湖販情願每包捐費一分業經該道添募馬隊三十名步勇一百名派弁帶往新蔡歸緝私局楊守節制分派各要隘駐劄梭巡辦理尙屬周妥惟隔省經理緝務全賴地方文武幫同協緝庶免掣

肘之虞據稟汝甯府李守汝甯營玉參將均能隨時關照具見畛域不分和衷共濟仰候加函咨請豫撫部院會札該二員查禁衛私以暢淮引所請夫馬公費准其照給仍將支應之款出運到棧之鹽分別開摺呈報

光緒十二年九月淮北督銷局道員徐文達詳竊照整頭汝屬廢岸稟奉憲臺批飭於新蔡縣設立緝私局以堵衛私水道來路並添設馬步勇丁派弁帶往上蔡之東西洪河及寺耳埠等處分駐要隘嚴防旱道以固門戶均蒙迭次咨請河南撫部院出示飭屬嚴禁並會札汝甯府李守暨玉參將協力查辦在案旋於五月間據新

蔡緝私局楊守等稟稱上蔡緝私委員李縣丞作桐汪
總兵東升隨帶勇丁於五月初六日在上蔡之蔡溝地
方緝獲私鹽五車計十五包隨經知會該處首事高應
書等幫同護送至上蔡照章充公充賞以示鼓勵詎有
蘆商豫泰順捏稱假道運赴開陳分店被馬莊居民截
搶等詞控經上蔡縣高令查明開陳尙係淮鹽引地批
駁未准當經職道據情移知地方府縣並請查明衛商
於淮鹽引地內開設私店一律封閉以清引界嗣據楊
守詳稱准汝甯府移知會蘆商豫泰順不知悔過又復
赴河南鹽法道衙門捏控批委候補知縣杜元勳到汝

查辦職道復又飭令總棧委員汪運判前往會同地方
府縣與道委查明引界安爲辦理案猶未結茲又據楊
守等報稱七月二十一日夜李縣丞汪總兵各帶馬步
勇丁又在上蔡蘆村地方緝獲大股私鹽護送梟犯一
百餘人持有軍火器械相持一時之久奪去洋鎗矛桿
各二桿迨至天明始行乘鹽遁去該員弁隨卽雇車將
所獲之鹽解交寺耳埠分棧稱收計重一萬四千五百
斤正在移行稟報間卽准上蔡縣移會又有蘆商同德
仍復以假道運鹽被土棍截搶等詞稟由督銷沈項蘆
鹽委員移請查追等情轉移稟報前來職道伏思越境

售私罪有明條汝甯七屬久被衛私侵占數十年來所
虧釐課不知凡幾近年又復任意侵入以致淮北銷數
日疲此次規復廢岸曾經前督憲左文襄公奏明於前
又蒙憲臺迭次咨請河南撫部院出示嚴禁不意該商
等於淮鹽界內藉寄莊名目廣設子店發販售私明知
淮岸所設緝私勇丁無多招結梟販包運包送橫行無
忌一經拏獲輒以假道被截爲詞誣控無辜擾害地方
察其居心殆欲激怒居民阻止淮勇緝私也至其所稱
假道連鹽職局本無舊案可稽或咸豐初年兵燹所阻
爲變通之計見在軍務大定道途平夷又何假道卽謂

假道自必運赴有引地之處今查馬莊以南盡屬淮岸
千百萬斤之鹽源源而來又將銷之於何處耶仰懇咨
請豫撫憲札飭所屬地方官封閉私店諭令淮衛商販
各保引界禁止繞越不准捏控誣民以靖地方經鹽政
會國荃批查河南汝甯各屬係淮北引地兵興之時淮
鹽阻運以致岸廢課懸自左文襄奏請規復廢岸後蘆
商之設店於淮引地界者早經咨請豫撫部院飭屬封
閉並經豫撫部院出示曉諭此次拏獲兩起鹽斤均在
上蔡地界其爲越境顯然乃蘆商輒以假道被截架詞
上控經鹽道派委查勘若不明定界址將淮界所設各

私店全行勒閉不特蘆商浸灌無所底止且恐彼此互爭釀成鉅案仰候加函飛咨河南撫部院速飭汝甯所屬地方官查明蘆商所設各私店一律封閉諭令淮衛商販各保引界以裕課餉而杜滋擾

光緒十二年十二月署海州分司項晉蕃稟據票販鴻慶有容等稟稱北鹽銷市之暢滯塲銷則視乎關銷關銷則視乎岸銷查汝甯府一屬均與衛鹽引地接壤如西平遂平確山等縣食衛則便食淮則難食衛則賤食淮則貴以致衛私侵銷淮鹽阻運久成滯岸而上蔡新蔡距淮較近水道能通舟運自便向爲淮鹽之暢岸遂爲

淮鹽之藩籬無如衛私中遠及近浸潤漸入而淮鹽復以釐重利微道遠運難商販均艱於前往是以名爲暢而實不暢前蒙正陽督銷釐局徐道憲擘畫經營力圖規復旋蒙大憲咨請河南撫憲凡有蘆商於淮鹽引地開設子店概行封閉嗣又蒙正陽督銷局徐道憲創行官運販運之法提運淮鹽濟銷凡此悉心籌畫妥善周詳無非爲鄰私禁絕復岸振興即可共固藩籬以期岸銷暢旺乃昨有湖販來壩僉稱運汝之鹽試辦兩年銷市迄無起色其故由汝甯之上蔡與陳州之項城接壤相距僅九十里而蘆鹽運行經過者每假道於上蔡影

射灌私賣爲侵銷之害並風聞有緝私搶鹽互控等案
販等竊思各省行鹽疆界分界之處無非接壤之處若
皆可假道運行其與越境透私何異前則衛鹽設店尙
有封閉今則衛私假道更無稽查查志載豫省陳州六
屬向食淮鹽於康熙二十七年改隸長蘆昔人已有淮
鹽門戶盡啟藩籬盡撤之患然則今日之上蔡卽昔日
之陳州淮鹽門戶藩籬盡係於此若任其假道透私毫
無阻隔勢必層層侵入無所底止且行銷引界不能稍
事通融卽如江運八岸以淮北之鹽運淮北之岸不難
由湖運逕達岸所道途較近腳價較輕而必欲使之由

江運者蓋防其藉以灑賣也再如桃宿邳睢四食岸與
皖省靈虹泗等州縣同銷淮北之鹽地屬毘連而四岸
之鹽如有越境售賣者卽以私論同一淮北引界尙有
不能通融如此而况分疆畫界之鄰鹽而能越境假道
者乎今衛鹽僞託假道之名而淮鹽實受侵銷之累若
僅以一岸之銷計所係尙小無如侵蝕不已勢必將淮
北行銷暢岸悉爲鄰私所襲取而淮岸日蹙銷市日疲
其

國課釐金實爲三省淮軍餉源所關甚大伏乞轉稟督鹽
憲俯賜咨請直隸爵閣督鹽憲暨河南撫憲飭令蘆商

各分引界確守定章俾保課運以安鹾業如嗣後蘆商
行運之鹽再有以假道經過淮鹽引地者卽以越境私
論等情卑職伏查運鹽各有引界越境侵銷例禁綦嚴
蓋以各省鹽引均有定額銷滯卽虧短課項故不容稍
有混淆查淮北汝甯府一屬與衛鹽引地犬牙相錯處
處毘連前因衛私侵銷年復一年以致汝甯幾成廢岸
業經正陽督銷局徐道稟蒙憲臺咨請河南撫憲凡有
蘆商於淮鹽引地開設子店者概行封閉淮北遠近各
販無不聞風踴躍以爲北鹽銷路從此推廣必可漸有
轉機詎蘆商於項城縣秦波樓地方開設子店並不循

例由城南薛橋行運轉以該處橋梁倒塌忽改道由上
蔡包河橋一帶行走以致侵銷淮引漫無稽查昨奉運
司轉奉憲臺鈔黏行知在案若不想請轉咨各憲飭禁
蘆商假道行運則衛私影射侵銷必致日甚一日將來
課餉短絀實於淮北全局大有關礙理合據情轉稟俯
賜咨請直隸督閣督鹽憲暨河南撫憲迅飭蘆商各按
引界確守定章不准再以假道爲名侵銷淮北引岸以
裕課餉而維全局實爲公便經鹽政曾國荃批此案昨
據票販等來轅具稟卽經咨明直隸督部堂河南撫部
院轉飭蘆商以後各分引界毋再以假道藉詞越境侵

灌並札該分司知照在案據稟前情仰卽查照

光緒十二年十二月淮北湖販祥泰豐等稟汝甯一屬爲淮鹽最要藩籬前當行銷暢旺之時本輕利厚其時汝岸各販或在關買往或到壩買運未聞以道路艱遠爲辭迨兵燹後設卡增釐本旣加重利無可圖而來者絕迹去者復以人地生疏道遠運難咸思裏足以致衛私侵灌門戶大開前蒙咨請豫撫憲凡有衛私於淮北引地開設子店概行封閉禁令綦嚴尤足爲淮鹽生色販等託業於茲無不願推廣銷路旣蒙大憲擘畫周詳藩籬其固自應運鹽前往以濟岸銷無如晝夜籌思迄無

良法嗣蒙正陽督銷局創行官運販運之法插輪提售
非不籌畫盡善第查到關之鹽挨輪守號向有定章自
有插輪之鹽提售爭先弊端由此而開而挨輪守號者
轉須遷延時日至運汝之鹽無論官運販運究因無利
可獲不能減價敵私銷市迄無起色似此情形於保輸
敵私終非兩利之法見經湖販趙同興勳慶長等六十
戶公同稟請於湖販到關之鹽統提一成以濟汝銷其
餘遵章先賣二成完釐以七成在關挨輪守號不准藉
故推諉違者議罰已蒙正陽督銷局批准獎許定於來
歲卽行開辦第思以一成運汝除二成完釐外以七成

守輪似於保輪非不妥協而於大小各戶非不平允誠能仍由官運照章挨輪銷竣之時由總局給價歸販販等亦樂於從事若謂給照自運其中窒礙殊多卽如運關湖販多至數百包大者千包小者五六百包今以千包提去百包而論如令其本船運往守銷無日轉運不靈雇船裝運鹽少費重尙須分岸售銷更屬乏人照料若謂輾轉託人孰肯以血本輕試於他人之手大戶如此其五六百包之零星碎戶尤可概見再近年汝銷不過二萬包上下今旣減價敵私所銷當不過倍之而以開鹽八十萬包統提一成而論計有八萬包之多以汝

銷較之每年應積壓四萬包層累而上何所底止以致
販本占攔轉輸無期是以販等到壩後得此傳聞願買
者均已進退維谷勢將人心涣散迫使他圖名求兩利
而疏岸銷轉恐畏難而礙大局度勢揆情亦非良策在
該販等議章具稟亦共圖規復起見而窒礙難行之處
實未籌議到此販等來去自由本無專責亦可置之不
問惟湖運有年藉資衣食今見聞所及既不能不以上
聞復不能不求實濟茲於不得已之中悉心籌議求其
變通之法以爲兩全之利伏思汝銷非減價不能敵私
而減價必致虧本非另籌貼補之法不可今查每年汝

銷約計三四萬包如能每包貼三錢以一錢五分作爲運汝腳價以一錢五分作爲減價敵私有此貼補本不致折利有可圖此後無論官運販運或在關買往或到壩運買均呈明正陽督銷局給發護照運至小淇河口報局查驗分投往售悉聽其便津貼銀兩隨照給發此時官運固可暢行他日販運亦當願往惟津貼之欵歲需萬有餘金另籌實屬維艱因思正陽關銷每當暢旺年分可銷至一百萬包卽以近年銷市而論亦在七八十萬包上下販等前奉飭捐每包塘工經費一分復捐汝岸緝私經費一分計每年官銷之鹽應捐經費銀一

萬五六千兩其緝費一分見正當分疆定界之時萬難
裁減而塘工經費一分因辦官運販運已改爲汝岸公
所等費查公所原爲運汝之鹽插輪提售等事而設今
既已改章津貼事權歸一無插輪提售之煩公所自可
停止可否仰乞憲恩卽將前項等費每包一分移爲運
汝津貼之用其餘所短銀兩再於到關之鹽每包捐銀
半分以足其數果能暢銷則有利可圖再當隨時另議
至正陽距小洪河口其中有數百里之遙均屬淮北行
銷暢岸一經給照放卡之後漫無稽考設有無知販戶
而於運汝之鹽或於中途暢岸灑賣此種弊竇難保其

無今擬請於給發護照之時取具在關的實保結庶有稽核總之照此運汝濟銷有津貼之費無紛擾之煩既可保輪復可敵私在今日官運固易見功而他時販運亦易爲力且有利則趨無利則避人之恆情計必出於兩全法必求其盡善爲此合詞縷陳經鹽政曾國荃批查正陽運汝之鹽據稟經趙同興等六十戶請按到關統提一成已蒙正陽督銷局批准等情未據徐道詳稟果有其事實多窒礙緣汝屬雖加整頓而衛私仍前充斥銷路尙無把握販情畏阻在所不免若按到關之鹽統捉一成無論該岸每年未必能銷八萬包之多卽所

稱守銷費重乏人照料若輾轉託人孰肯以血本輕試
於他人之手等語均屬實情大戶如此小戶可知種種
不便奚可強以所難仰候飛札徐道查明停止以順販
情至前定自運公運兩法本係批令試辦三箇月再行
定案究竟出運若干銷過若干未據徐道接旬具報有
無成效無憑稽考儻因插銷提售弊端由此而開亦屬
難以持久據擬將塘工一分移爲運汝津貼之用所短
銀兩再於到關之鹽捐銀半分自係爲力保藩籬起見
是否可行應由徐道妥速核議詳奪嗣經徐道稟復遵
查規復廢岸以緝私爲重緝私旣設以運鹽接濟爲要

前年奉檄准河南撫部院咨覆飭催淮販運鹽赴汝接濟民食以免脫誤等因而眾販亦以汝岸久廢衛私日進關銷年疲一年紛紛稟訴職道仰蒙委任以督銷爲專責當此商因日增大局日疲自應力圖報稱仰體憲屢故明知迭次興辦未成之事先籌保固藩籬再爲得步進步之計第數十年廢岸比時湖販大半人地生疏孰肯輕易嘗試職道因卽飭派楊守帶同員弁酌提販鹽七千二百包運往試銷猶恐開辦伊始折耗商本遂議每包給以津貼運費錢二百文到汝之後分撥各處酌定價值既可保固商本又不令民間食貴行之兩月

銷售四十餘包按照正陽牌價除去水腳駁費等項連
津貼之二百文計算雖鮮盈餘亦無虧本職道體察情
形採訪眾論均謂從此認真整頓必有成效惟津貼一
項實無長欵支給因與眾販議設公運自運兩法不減
釐金不給津貼商捐商辦委員督率稽查稟奉批示准
行試辦三箇月再行定案職道遵飭湖販公所籌辦公
運鹽二萬四千九百八十七包又據湖販楊復順等自
運鹽四千五百二十一包原期銷數漸暢商販有利可
圖自必樂於從事詎知蘆商奸計百出見淮鹽陸續而
來便襲上次故智跌價相抵又復以寄莊借道朦混以

致官私夾雜淮鹽銷數仍難起色而公運之鹽到輪既
須給還各販關上牌價勢不能久擋利已盡歸於商由
公經理終不及各販自行經理之得法堆積日久耗瀉
更重難免虧折而自運者見銷路不暢恐守候日久畏
縮不前職道又與各販再四籌思於到關之鹽有願自
運者除照章先售二成完釐其餘八成准其提輪先售
一半以一半運汝守輪銷售以示鼓勵而恤商情以速
補遲亦於輪章前後牽算無礙計自上年先後運鹽四
批雖僅止一萬五千七百餘包然查自二月添設緝私
之後已有汝屬本地販戶乘衛就淮陸續來關購運每

月約二千餘包不等逐漸推廣冀可化私爲官惟此等
販戶既不挨輸守號於各鄉集鎮人地熟習彼此往來
可以賒欠故銷售較速以致公運自運愈形稽遲且該
販等避滯趨暢來去靡定又不可恃以接濟必需仍由
正陽籌運分儲各處方無脫誤惟公運既須折耗無欵
賠貼自運又恐守候過久花費愈重以故遲之至今不
能稟請憲臺定案者此也職道上年冬初由甯返局查
詢前路存鹽無幾連日督催眾湖販通同集議接濟之
法眾販亦知汝岸開辦以來正陽銷數已見起色十一
二兩年內除汝岸不計關銷均在七十萬包之外卽以

汝岸而論計自十一年六月運鹽前往八月開售起至十二年十二月止統計不過年餘公運自運及汝販購運銷鹽已有七萬數千包猶係試辦之初引界未清私店混雜衛私跌價相抵之時見蒙憲臺迭次咨請出示封閉私店清查引界將來自必更徵旺銷聞蘆商近年因跌價虧本已屬不少其勢豈能久持自應儘此一簣之力以竟全功所以有趙同興等六十戶呈請統提一成自運自銷內分三成入小洪河於鄰近衛鹽處所減價敵私以七成運入汝河售銷之稟職道察核所議雖爲眾擎易舉共保大局起見猶恐係一時義憤所激不

能持久第思眾議如此似不便阻其踊躍急公之念當
經批准俟開正詳稟憲臺核奪定案以便舉行今祥泰
豐等二十戶既以窒礙等詞具稟蒙飭飛速停止卽傳
令前稟六十戶一體懔遵至於公運旣須虧本自運又
無人願往且插輪借墊諸事在所必有該販等旣謂有
弊端勢必一併停止惟人心旣散濟汝之議頓息而汝
岸不能一日無鹽必須妥籌良策該販所請塘工一分
作爲津貼無論官運販運每包貼銀三錢如有不敷到
關之鹽再行加捐半分之處亦無非爲汝岸不能不復
力顧大局起見其情雖殊其義則一查塘工一分原稟

作爲籌濟公所及汝岸總分各棧經費今欲改爲津貼
自應照稟將公所各棧一併裁撤惟細察原稟其所謂
官運者卽見辦之公運也若買鹽濟運資本無出即使
仍向湖販借提而一經到輪務須給價儻借去之鹽售
銷未清又在何處墊給况棧所旣裁無人經理何由承
辦若歸販運則情節不同有圖安逸者推諉不前希圖
津貼者或亦願往出卡之後無委稽查則灑賣等弊勢
難必無縱使取保查驗難免流弊且到汝之後地有遠
近銷有暢滯畏難趨易人之恆情無人督率勢必於旺
銷處爭先搶售滯銷處裹足不前官鹽一缺則地方官

民有所藉口且如汝河之內處處鄰於暢岸有此三錢
津貼必多盤越之弊恐徒費鉅款難期實濟至於塘工
一分統計每年不過八千金查湖販精力已竭不肯再
捐卽如加捐半分亦不過一萬三千金之譜照汝岸見
在銷數所少尙多有此津貼可以減價自必暢銷不敷
之數甚鉅應從何處添籌且公所總核原爲察奪盈虛
籌運籌銷及經管帳目報銷而設一經裁撤則諸事應
歸何處經理該販票中均未議及職道奉札之後迭次
傳知祥泰豐等二十戶公同集議祇有祥泰豐仁豫長
茂興三戶商夥到局詢知稟內列名之家多係票販出

湖者與名掌事東家均在西壩此次具稟由壩上所爲該商夥等不能作主職道伏思該販等旣爲票販中之大戶自運出湖有年於正陽及汝岸情形均所深知此次旣公同具稟自必另有主張決非徒爲一已之私妄生議論一稟了事阻撓大局者可比見查汝岸各縣儲鹽不過數千包二月初閒卽需起運接濟儻有空缺貽誤非淺應懇飛飭海分司迅速督飭該二十戶再行安議如何接濟鹽斤明晰詳呈節轅核定經鹽政曾國荃批該道所論汝岸總分各局不能裁撤亦極透澈籌運之道總視利之有無爲斷運汝果有利獲則商販不招

自來今公運既須虧本自運又無人願往則前次祥泰
豐等請免提一成莫非深恐受累無怪其然但此後應
如何濟運方爲妥愾仍須該道一力主持庶幾權無旁
落非該二十戶所能妄參末議大致目前汝岸銷路尙
無把握不能遽定久遠之章欲籌接濟非仍提販鹽不
可欲提販鹽非給以津貼不可或將汝岸總分各局應
行開支歸於公項籌畫騰出塘工一分先就肯往之戶
議予津貼揣度販情但求不致虧折當可勉從

光緒十三年二月淮北督銷局道員徐文達詳查濟運之
法誠如鈞諭總以利之有無爲斷自前年試辦之初恐

虧商本每包給以津貼錢二百文嗣以無此鉅款開支
遂與各販籌議改爲自運公運兩法當時計算成本水
腳一切核之汝岸定價但得銷數漸暢公運之鹽不須
虧本其自運者轉輸較速獲利亦差勝於正陽守輪之
販以爲從此逐漸推廣自運日多兼有汝販來關購買
便可停止公運一意緝私爲久遠之計詎料蘆商仍照
從前故智跌價低售又以借道寄莊種種蔽謬致使官
私夾雜銷數不暢公運既須虧耗自運又畏葸不前第
數十年廢岸幾費經營辦理已有端倪斷不能因循畏
難再誤大局往後更不可收拾前趙同興等六十戶所

稟統提一成減價敵私欲以關銷九成之獲利以補運
汝一成之虧耗實因蘆鹽於淮鹽成本所輕無幾不能
久跌原冀私退官銷永遠樂利然販情不一勉強施行
終不能持久業已遵飭停止不行祥泰豐等二十戶所
稟裁撤公所加捐經費每包津貼三錢職道察核所議
亦未妥愾且湖販勢難加捐是以稟請札飭海分司就
近妥議稟辦茲奉憲飭此後應如何濟運仍由職道一
力主持又蒙俯念商艱令將總分各棧經費或歸公項
籌畫騰出塘工一分津貼願往之販足徵保岸恤商之
至意職道悉心體察統提一成既經停止公自兩運又

均難行惟有遵示妥籌辦理當卽傳令各販一再計議
查塘工一分每年約收入千兩上下以汝岸目前銷數
歲約五萬包津貼一多則不敷支給且恐生盤越等弊
津貼太少又難濟事且如見辦之上新汝陽數縣引地
路有遠近銷有暢滯自應分別等差以定津貼聽販自
運自售委員掣驗稽查分派濟銷總期暢岸無擁擠之
患滯岸無脫誤之虞若鹽歸販運私由官緝行之數月
察看情形能否持久便有把握將來銷數如果大暢自
當另議辦法大約月底月初卽須籌鹽起運至於汝岸
總分各棧此後僅有稽查掣驗彈壓之責無收售鹽銀

帳目等事一切經費自應大加裁減查上年公自兩運之鹽截至腳底除銷僅存八千餘包應令趕速銷售截清界限督飭籌濟公所結報以清起止再由職道酌核必不可少之款另行稟請示遵約計每月不過三四百金另捐一分經費經費抵支馬隊三十名每月口糧馬乾糧一百五十餘兩步隊一百名每月口糧銀三百兩哨官棚頭長夫每月一百十餘兩所有見議湖販自運赴汝減價敵私章程謹繕清摺呈請核奪批示祇遵

一凡湖販運鹽至正陽上下仍照向章先售二成完釐其餘八成如有情願自運赴汝售銷者卽持釐票赴公

所報明花名鹽數再由公所取保開單呈明督銷總局存記按月酌定數目起運不准爭先落後其八成中有願撥運數成者亦可一販鹽起運由督銷總局填給

護照先發一半津貼由南卡掣驗捲查放行鹽船駛到洪河口卽持護照赴汝岸新蔡總局逐細捲驗如有短少卽在護照註明除扣津貼按章每包罰錢五百文並於照內註明某日到新蔡某日派撥何岸查驗後蓋用查過戳記運抵指撥之岸再由該岸稽查委員驗明護照任聽各販自行售銷於照內均註明何日到岸何日售竣蓋用戳記該販鹽船回空到關再持護照呈送總

局核算我給津貼錢文護照繳銷存案按月彙報以備
查考一凡各湖販鹽船先到新蔡查驗後卽由總局
酌度盈虛分別運往不可擁在一岸致有缺擠之弊道
路有遠近津貼定多寡已與眾販當面訂定諒無趨避
另由總局札飭各縣各岸委員隨時稽查事事保護並
督飭各行戶公平交易不准拖欠客本隨時稟請地方
官查禁且河內有礮船游巡護送以防盜賊岸隘更有
巡卡分駐事事可以照顧周到以安商業一湖販自
運鹽斤到上蔡及東西洪橋等岸售銷者每包給津貼
錢五百文一湖販自運鹽斤到汝甯府城及城外售

銷者每包給予津貼錢四百文。一湖販自運鹽斤到寺耳埠廟兒灣售銷者每包給予津貼錢三百文。一湖販自運鹽斤到新蔡縣汝南埠翰棟等岸售銷者每包給予津貼錢二百文。以上分別津貼錢文以見在銷數度之洪河以內約計一萬五千包汝河以內約計三萬五千包兩處其約銷五萬包統計約需津貼錢一萬三千數百串騰出塘工一分合計似可敷用儻從此核實辦理其維大局銷數大暢有益於課釐者不少津貼不敷再行察酌隨時與運司海分司妥籌稟請憲示辦理經鹽政曾國荃批汝甯廢岸經該道傳各販一再

計議就道路之遠近定津貼之多寡所議章程七條簡便易從而於體恤之中仍寓鈐束之意如此辦法已比自運公運統提一成毫不勉強仰卽飭販照章起運如果銷數大暢津貼不敷則成效昭著彼時自易集議其總分各棧此後事簡一切經費擬大加裁減所稟亦是並卽連同另捐一分由該道斟酌妥善分開清摺稟候核示

光緒十四年四月淮北督銷局道員徐文達詳據湖販聯名稟稱籌鹽濟銷汝岸自上年三月更定新章津貼湖販自運自售以塘工一分作津貼之費業經各販遵章

運赴在案查塘工一分每年約收錢一萬二三千串照
章每包津貼二百文連同洪河以上分別遠近加增各
錢統算僅數五萬包津貼之用茲查三月分至十二月
底陸續共已運過鹽七萬六千四百包內除已運未銷
回關者二萬二千九百五十一包未經找給津貼外總
計前後已經發給津貼錢一萬四千四百三千七百文
合銀八千五百七十三兩六錢三分九毫自三月至十
二月共收一分捐款銀七千一百五十兩六錢五分抵
支仍實不敷銀一千四百二十二兩九錢八分九毫業
經截數造報已蒙遵照督鹽憲批示卽在建屋挑河欵

內動撥以清欵目但津貼見已虧空再不趕緊設法誠
恐愈空愈多累無底止爲此公同籌商擬自本年正月
起所有運汝派撥二成赴廟灣寺耳埠楊埠東洪橋及
府城等岸者仍照舊章津貼其餘八成在小洪河口汝
南埠翰棟三處暢岸銷售者每包酌減津貼一百文爲
節省之計儻遇冬令水淺盤駁艱難之時則一律統歸
原議二百文給付均不少減應由公所董事隨時察酌
情形稟明辦理無論水大水淺總當源源濟運有始有
終不致稍有脫誤並於請領護照時聲明遵章赴汝水
大不得搶運擁擠水小不得推諉退避等情各具切結

由公所轉送備案至於應支津貼如果塘工一分暨建屋挑河餘欵合併可敷支給固爲販等共願若或銷數愈暢運赴愈多津貼仍不敷用再當察看情形稟請鑒核轉詳等情除批該販等以汝岸銷鹽較暢津貼不敷公議運鹽到汝凡在新蔡汝南埠翰棟等處售銷者每包減津貼一百文如遇冬令水淺盤駁艱難仍令照原定津貼於節省之中寓體恤之意所議甚是准從本年正月起如稟辦理所有上年起運之鹽本年始銷訖回關者仍准照章找給津貼以昭大信至於府城上蔡寺耳埠廟灣等處均與蘆境毘連自應仍照定章毋庸議

減以廣行銷將來如果銷數愈暢起運愈多塘工一分
暨建屋挑河餘欵仍不敷用彼時再當察看情形通籌
核辦惟見在銷數既暢運鹽不可脫誤誠如該販等所
稟務當源源籌運水大不得搶運擁擠水小不得推諉
退避各遵所議共維大局毋得反覆自誤牌示外查湖
販運汝之鹽分撥在新蔡汝南埠翰棟三處售銷者十
之七八均由汝河上至府城與正陽確山息縣相近該
販所稟每包酌減一百文原爲津貼不敷起見職道查
正月分未經運鹽轉慮諸販退焉自阻故未遽詳茲查
二三兩月陸續起運鹽二萬三千餘包減去之後尙屬

兩淮鹽法司
第十一
三三三
踴躍當此經費支絀之際自應准如所稟暫行試辦經
鹽政曾國荃批據詳運汝之鹽分撥新蔡汝南埠翰棟
三處售銷者自本年正月起每包酌減津貼一百文餘
仍照舊津貼自係爲力顧公欵起見准如所稟辦理卽
遇冬令水淺亦照此辦以免高下其手之弊

謹按汝甯一岸於光緒十三年經直隸總督李鴻章
兩江總督曾國荃河南巡撫邊寶泉委員會勘淮蘆
兩岸引界議定陳州境內不准淮商開設子店汝甯
境內不准蘆商開設子店永遠遵守詳見引界

兩淮鹽法志卷九十

續錄門 整理文草

兩淮鹽法志卷九十一

督銷門

南北加引

上

自曾國藩初定環章卽有不派捐不增引之約蓋恤商
卽所以保課其爲謀至深遠也光緒七年左宗棠督兩
江適值銷數暢旺淮南北並加新引一時籌運疏銷幾
窮於術引積綱停其勢岌岌於是淮北仍議裁減而淮
南則新引加多以引地難復未睹明效然其時部臣比
較課項鹽政權衡斤重視商利之厚薄定票費之高低
亦治筭賦者所宜消息也志南北加引

楚岸加引

光緒八年正月湖廣商人賀全福等稟伏查鹽法志載湖廣引額湖北應行五十餘萬引湖南應行二十餘萬引同治初年前督鹽憲曾重整鹽務刊章咨部湖北暫行十六萬引湖南暫行八萬引四年湖北減爲十二萬引湖南增爲十二萬引七年湖南增引一萬二十年湖南南北各增引一萬統計湖北祇運十三萬引湖南祇運十四萬二千引兩省實欠額引四十餘萬近年戶部屢經奏議增復引額先後五次均屬有案可稽溯自前督鹽憲曾以後至前督鹽憲沈任內始有增復引額之議

究以因循尙未舉行其餘各憲均未十分認真整頓故商等不敢以此鉅金輕於一試俟中堂興利除弊一秉大公中外人民無不欽仰幸逢憲節榮莅商等情殷報效謹援案呈繳庫平銀六十萬不敢仰邀議敘懇恩准給湖廣淮鹽十五萬引以十一萬引歸入鄂岸以四萬引歸入湘岸並懇札行湖南督銷局編入見行綱分與見行各商一體環運輪銷查湖北各商從前捐過清水平潭隄工每引五錢儀徵河工每引八錢閩捐每引二分晉豫捐每引一錢二分前年戶部奏收票本捐每引一兩八錢湖南各商其清水潭儀徵河閩豫晉捐與湖

北一律票本捐每引一兩六錢另捐本省積穀每引四
錢統計每引鄂商捐過三兩二錢四分湘商捐過三兩
四錢四分茲商等請十五萬引捐銀六十萬兩合每引
四兩較見行各商所捐有盈無絀同治十年前督鹽憲
曾增湖南各一萬引每引收銀四兩商等此次所捐
尙與成案相合惟所捐必須解運見銀如蒙恩准請自
奉批之日起予限二三箇月繳清或逕繳憲臺衙門或
分繳湖南督銷局伏候批示祇遵經鹽政左宗棠批
淮鹽行銷湖廣咸豐元年辛亥綱定爲六百斤大引四
十一萬三千四百五十六引兵燹之後引滯課懸金陵

克復壘經各前任重整鹽綱陸續興復二十七萬二千
引尚欠十四萬一千四百五十六引未復茲據該商等
稟繳庫平銀六十萬兩請給淮鹽十五萬引一體環運
輪銷復引額而裕

國課事原可行本爵閣部堂莅任以來訪察鹽務情形已
知梗概查商販挾票壘斷居奇夾帶私鹽虛報淹消弊
端顯露其不願加增新引自在意中該商等報效情殷
以加引爲請就此時鹽務言之金陵收復已十有九年
各岸引地生齒日繁銷路應暢而猶拘守舊規不爲加
引之計坐視引滯課懸一任商販營私專利徇商情而

卷之二

國課既非事理所宜川粵侵越淮鹽引岸爲日已久不及時加銷淮引聽其日侵月削無論淮南場竈商民以失業而謀生日蹙

國課常懸且以川粵運道艱阻水陸轉輸程途迢遞亦時有不濟之虞而鹽價日昂小民不免食淡之苦江西湘鄂均將受其弊其於

國計民生所關洵非淺鮮是淮鹽加引乃今時萬不宜緩之舉無待再計也惟就見時改票而言未復之引尙十四萬有奇一時復額溢銷亦難確有把握而改票以後

商販以領票行鹽獲利羣思多領多銷近時鹽票每張
值銀一萬五六千兩固人所共見其聞者茲據該商等
呈稱繳銀六十萬兩請票三百張是每票一張僅合銀
二千兩較之民間私相授受價值懸殊無論票由官給
不可由官減價致票本輕於民商私定之價特開損上
益下之端且票本既減則商販紛紛請領將來引多銷
滯之患必由此而起應定爲每票一張票本庫平銀一
萬二千兩如湊集眾款數逾十萬引准其酌減每票一
張定爲庫平銀一萬兩庶期允協該商等如願請領仰
卽遵照繳銀聽候給票起運可也

光緒八年二月商人賀全福等稟兩湖鹽票向祇買三千金從前銷路未暢二十七萬引不能銷足占擋月息商販無可取巧票價從未增至萬金自光緒六七年銷路漸暢始有此價鹽票有見綱下綱之分目下春綱曰見綱秋綱曰下綱鄂票見綱買一萬四千下綱一萬二千湘票見綱一萬三千下綱一萬一千並春秋綱合算鄂票祇一萬三千湘票一萬二千商等所請三百票係分春秋兩綱不能統稱見綱至鄂票一萬六千去年江西商人鄒姓還帳以票二張作抵三萬二千並非見銀買票此外卽一萬四千之票亦不過三數起湘票買賣

更屬寥寥買票必須更名如買田之更糧冊憲臺衙門
光緒六七兩年中兩湖更名稟帖究有幾何此皆有案
可核也今年商等進稟之後兩湖票價已經陡減數千
兩且無人問津大凡物以罕而見奇前此商販把持數
十年之久以爲永無增引之日任該商從中取巧故爾
執票居奇兩湖五百四十四票其中未費一錢請來者
居十成之五二三千買者十成之三四至費八九千或
萬金以外者僅十成之一貴買之票獲利尙淺自不肖
賤售賤得之票獲利尤久一聞鹽票旣增價所必減辦
運多年每張已獲數萬金之利今卽數千賣去亦是平

空白賺雖云捐過千數百金係十數年中零星輸納直
如九牛一毛票價之貴賤視鹽利之厚薄爲轉移曾文
正公創定規模五岸利錢一律見在江西五百引買六
七千安徽二百二十引買五六千淮北小票小引官定
每張十引民間呼百引爲一張買二三百獨兩湖五百
引買至萬金以外誠如憲批各岸生齒日繁銷路漸暢
二十七萬引將不敷銷因之取巧獲利比原定章程較
厚是以價昂今驟增三百票僅銷正引尙須寶力疏導
其勢無巧可取其利自然頓減楚鹽定章每票成本六
千餘兩刊章具在人所共知除扣去釐金各費領價僅

八千餘金一年數月之後所賺二千有零無本之票按
六千餘金成本扣利可合三分商等先捐二千應合成
本八千餘兩不過二分幾釐近聞示禁金陵典鋪重利
祇准二分周年尙合二分四釐商等亦祇求二分之息
除已輸二千不計外應加捐若干商等不敢擅請惟有
恭候酌定總之辦鹽一票並票本鹽本一年可獲二分
息錢之外不敢再有覬覦如蒙恩准仍求批給商等三
十四名十五萬引編入各該岸見行春秋綱分與舊商
一體環運輪銷捐輸庫平銀六十萬兩求予限二三箇
月呈繳此次酌加之捐請自引地收復之日再繳上年

老商票本所繳票本捐每票數百金亦係分限呈繳老
商專利自封十七八載繳數百金既可分限商等於未
獲利之先首輸已逾數倍成本比較輕重懸殊中堂愛
民如子一視同仁必不至稍分厚薄至賣票一層商等
未繳捐以前並不求給票自無票可賣既繳以後卽刻
須赴運司衙門繳釐繳價捆鹽何得尙有多日賣票況
兩湖鹽票此刻已無人問津商等縱不尙出賣尙有何
人願買近年之票皆係老商互相轉買在老商已享大
利但期利權歸一多費數千金亦所不惜商等請引老
商視若讐仇尙肯以重金購商等之票耶此不辨自明

也憲批票捐過輕恐紛紛請引至滯銷路此誠俗課恤商之至意今商等願再集眾款求領十五萬引兩湖四十餘萬定額已屬有盈無絀以後無可再請矣經鹽政左宗棠批湘鄂兩岸運鹽一票祇需成本銀五千餘兩銷完得價可九千餘兩其無票本者獲利自厚卽有票本之商若一載能銷一次除去成本月息仍可獲利二分有餘將來五府二州引地收復則銷路愈廣銷售愈速獲利更厚自不待言而鄂岸五府一州引地旣圖以漸收復則必場竈所出垣商所固鹽色鹽味潔淨一律而後可便民食而敵川私選委廉能員弁驗收重淋及

真梁項梁正梁各上色之鹽毋許以低雜攬和發運庶重官砠而齊成本鹹綱可得而肅也鹽之來源旣清鹽之銷路又須預爲詳籌始於全局有益試行之初商情不無觀望須行官運一二批以導其先而鄂岸尤宜擇川鹽來路設立水陸緝私各局卡然後明侵暗占諸弊漸次斂戢官鹽得以暢銷是設局添勇造船置礮事不容已需費亦鉅旣未便另立名色攤派票商應卽從票價內畫款支應凡此皆創行之初所宜統籌並計者本爵閣督部堂以裕課便民爲重自不得不以恤商爲裕課便民之首務凡此皆不待該商鰥鶩過慮而已籌度

及之前次批示票價散領者多躉領者減良有以也茲據稟前批每張票萬兩萬二千兩票本稍重獲利無多懇予少減姑念未復之引地甫議收復該商等驟領新引多張能否暢銷自覺尙無把握姑准每票減作五千兩運銷此次之後由本爵閣督部堂屆時察看並與官運比較如果新商獲利不及二分所有票價仍准酌減儻獲利在二分以上則票價自應酌加一俟加定之後再准循環起運俾成永利庶於

國課民食商情三者均有裨益除見繳之六十萬兩准赴運司衙門自二月起限三箇月繳清外其餘九十萬兩

應限年內繳清不得藉口遲至收復引地之日至繳清六十萬兩之後卽由運司詳報發給該三十四商十五萬引編入見行春秋綱分與舊商一體輪銷新商將來有願赴見在未復之五府二州地方行銷者亦聽其便光緒八年四月鹽政左宗棠奏竊維江淮財賦以鹽課爲大宗淮南北官鹽運銷皖岸西岸鄂岸湘岸地大利博浙粵四川長蘆所弗及也乾隆嘉慶年間征剿大小金川蕩平臺灣戡定川楚各匪淮商屢輸鉅款時稱極盛厥後憑執根窩坐享厚利紈袴相承鮮知營運而鹹業遂衰道光十一年前督臣陶澍創行票法以救淮北之

第嚴剔陋規以除淮南之弊從此奏銷正雜各款每歲
數百萬始資敷衍後之恪守遺法並擬賡續恢張者惟
陸建瀛惜時會倉皇有志未逮迨髮逆披猖長江梗阻
引地徧遭蹂躪金陵被陷鹽法蕩然皖岸銷淮北之鹽
兼借銷海濱之鹽鄂借川鹽湘岸西岸兼銷粵鹽浙鹽
但取顧濟民食畫地徵釐遑問淮課同治三年金陵克
復江路暢行前督臣曾國藩始概請改行票法維時垣
籠久荒課懸商散官運商運均未能行惟招徠票販試
行各岸但期淮鹽銷路漸暢不務求贏也按咸豐元年
綱額鄂湘兩岸行六百斤大引官鹽共四十一萬三千

四百五十六引同治三年以後祇行二十七萬二千引
咸豐元年皖岸行六百斤大引官鹽共十一萬四千八
百五十八引同治三年以後祇行七萬二千引西岸則
被禍較淺淮鹽由九江湖口而入銷數照常有加咸豐
元年綱額行六百斤大引官鹽十四萬五千一百二十
引商販請領十七萬引見尚有加領引票者臣以行銷
溢額皆暫停未給此外皖岸鄂岸湘岸則收復已久引
額常懸而場垣存鹽日多皚素山積海濱之民煮海爲
業者皆盼盼終歲無以爲生而主持鹽政者猶堅持加
引無益有損之說悍然不顧商販有加引請者概予駁

斥棄

國家二百餘年一成不易之法如弁髦委沿海數十萬戶一息僅屬之民於溝壑誠不知其何說也議者謂川鹽借銷鄂湘兩岸爲日已久今改票法行淮鹽慮非川中官商所便然四川頻年經營西邊鹽務成效已著督臣丁寶楨因川鹽銷數日增始擬退還引地兩淮因銷數日減卽收回引地均事理所宜然況前經御史張觀準周聲澍等奏請增復引額各案商販又曾以加復引地爲請人情大同已可概見孟子曰雖有智慧不如乘勢管仲亦言俗之所欲因而予之將籌上裕

國課應增淮引今時易然無待再計議者又謂湖北賴川鹽以濟軍餉茲復淮引必絕川鹽湖北驟失餉源慮非所便不知湖北之利在徵鹽釐從前淮鹽引地幾廢川鹽借岸暢銷故賴川鹽之釐濟餉假使淮南引地速復川鹽借岸已還湖北釐金不能取之蜀者仍可取之淮淮鹽暢銷則楚釐愈旺於湖北何不利焉況湖北近議撤營節餉養兵之費較前有減無增就本省入款籌之料非不足縱使遇有急需而兩淮鹽利有餘仍可隨時挹注亦斷無恝置之理從前沈葆楨議淮助鄂餉歲可百數十萬兩本是紙上空言但貽畫餅此則取懷而予

奏案可憑就銷數徵釐終歸實際爲湖北計與其食借
岸之餘曷若協力並規助行淮鹽同享正引之利之爲
理得心安也臣前於

陛辭時親承

聖訓諳諳以兩江鹽務海防並重受事以來通稽鹽務成案
參之僚友規畫旁採紳商議論知裕課便民之道舍復
岸增引別無可圖而欲復岸增引非詳察商情嚮背與
夫利害所在權其輕重合時俗之宜開誠布公行之不
可時踰三月略具頭緒謹爲

皇太后

皇上陳之一曰講求鹽質也淮鹽約有兩種淮北曠鹽藉風
日之力而成色白而味佳淮南煎鹽取滷注鍋鏹火煮
而成色黯而味微澀北鹽較南鹽利於銷售惟場分無
多產鹽不盛不如南鹽產地多而配銷引岸又遠且廣
也川粵之鹽略與淮北相近色味均較淮南爲佳引地
之被其侵占雖由成本之輕亦由鹽質高於淮南之故
從來辦理鹽務莫要於緝私而欲私淨官銷莫先於減
價誠以價平則銷數自暢也然鹽價雖較私爲減而官
鹽色味不如私鹽之佳則其勢不足敵私民食終難舍
彼而就此故收回引地從前官商未嘗不意度及之而

終不免懷疑自阻者以色味不逮也臣按煮海成鹽既資人力則色味高下自由人力致之訪知場垣存鹽之向稱上色者曰真梁正梁頂梁三種尤貴者重淋一種其色味與淮北無異重淋云者蓋卽取場籠存鹽重加水淋瀘出而成者取至驗視色白味佳較蜀粵所產殆有過之而其價每斤不過增錢一文有奇而已見飭場員垣商儀徵掣驗委員通照重淋一色煎收嚴禁羼和混雜爲正本清源之計蓋無論能否敵私而講求鹽質裕課便民本鹽政應辦之事也一曰裁減雜款規費也鹽務本腥羶之場自鹽政運司至驗掣分司經歷大使

知事文武印委各衙門例有公費外善舉有費供應雜
差有費以及挂名差使薪水乾修凡取之鹽務併入票
本積算者繁鉅日增茲擬善舉有益地方准隨時酌議
加增此外應裁者裁應減者減逐加釐定備案嗣後不
准別立名色違章巧取以身先之期於其濟庶幾成本
可輕而減價敵私之效可觀也一曰緝私宜嚴也私鹽
之侵鄂岸者川鹽爲大宗其借岸行銷者不必論近由
荊州監利而上侵至借岸之外而武漢黃德一帶並受
其患矣私之侵湘岸者粵爲大宗其專岸行銷者不必
論近越衡永寶三郡侵至專岸之外而長沙各屬並受

其患矣此猶下游之患在意中者也其意外之私如浙江岱山所出之鹽價極廉而產極旺甯波釣船夾板洋船公然裝載由海口駛入長江插用洋旗不服盤詰內地輪船亦然而直隸福建採辦米糧之船各省差遣來江輪船皆將裝鹽上運非預示阻截徒賣之局卡員弁臨時議禁勢有未能此猶外來之患也至臬匪私中之私票販官中之私難以數計尤爲境內之患防不勝防臣見飭水陸各營沿途巡緝一面張示曉諭先清外來及本境官私隱患以湮其源一面減致四川督臣湖北督撫臣請其助復引地仍挑選臣部親軍水陸各一

營赴湖北四川交界引地備巡緝之用庶幾同心共助
於大局有所裨益一曰先行官運以導商也收回引地
本商販所至願然驟議通行事同創舉商情有不能遽
釋者不能不行官運以導其先茲擬遴選妥員領五千
引運赴湖北荊州借岸由螺山監利漸入試銷所有領
運成本銷售價值均與商販一律辦理略無異同意在
藉悉運銷出款售鹽入款了然心目然後量其贏縮定
爲永遠章程庶幾裕課便民恤商三者兼權並計推行
盡利其法乃可大而可久每於接見僚屬士紳時往復
諮詢得其大概而新舊商販知事在必行行之宜有益

無損於是領票認引者紛紛而來商人賀全福等請增復楚岸十五萬引伊厚堃等請增復皖岸四萬二千八百餘引其湖南之衡州永州寶慶三府舊本淮南引地因粵私侵灌別爲淮引專岸究無鹽到岸行銷見據商人福慶祥等呈請收還舊額四萬六千八百餘引其岳州屬平江縣地連吳楚灘險山高淮鹽不到亦稱專岸本地商販頻年行銷碱片已一萬引今據新商怡同興等復稟請加領二千引統計莅任至今逾三月楚皖兩岸新復十九萬二千八百餘引行銷一次課銀約可增十七萬兩有奇鹽釐增收約銀一百二十萬餘兩而衡

永寶三府請領試行專岸引票平江一縣請加運碱鹽
尙不預焉見在額引領畢各岸之續請加引者猶絡繹
不絕竊以引票積多恐妨銷路未敢率准應俟此次新
加引鹽辦理奏銷後再議微臣察看見時商情異常踴
躍實爲始願所不及加引旣行場籠戶口得蒙業相安
藉以養活兵燹遺黎可轉移執事自食其力固在意中
而善後諸政得所藉手次第興工尤爲意外之幸也謹
卽據實陳明稍紓

慈厪

光緒八年四月湖北督銷局道員程桓生鹽法道武震等

稟奉札據商人賀全福等稟繳報效銀六十萬兩限期
於三四月在湘鄂兩局交清並鈔發商名票號匯兌銀
數及匯票四十二件下局並奉另札所有三月底期漢
口匯票號應提銀十六萬八百四十兩由局提交祥雲
輪船帶解回甯其四月底期滿銀兩屆時應候提解遵
查黏單內銀色係屬估值奉發匯票內註明二四估寶
兌交自應照票核收惟估寶係市上交易之銀向用其
名不用其票均以實銀由公估局批估譬如元寶一箇
申水四錢者爲二八寶則足銀五十兩卽號五十兩四
錢申水三錢者爲二七寶則足銀五十兩卽號五十兩

三錢其中亦有申水三錢五分二錢五分者不等所估之碼卽准此元寶分量本有輕重批估成色亦有上下數旣奇零所申之水本已扣去勢不能逐封每百合作整數惟有認真看估銀色將其原交元寶原估數目逐一登記號碼元寶內亦逐一黏貼號碼每封估寶兩箇加貼印花每元寶四十箇裝成一鞘編列字號以憑核對所有三月底期漢口各票號應兌長平二四估寶銀十六萬八百四十兩連日平兌估色分別編號包封先將收就封固長平二四估寶銀十二萬三千六百四十四兩三錢四分係連批估申水在內計裝六十鞘點交

管帶輪船都司李家泰提解憲轅其餘三萬餘兩另行
續解再將號碼清摺齎呈查對至估寶申水虛數合足
銀實數須俟六十萬兩繳齊方有總共的數約少成色
四千七八百兩又黏單內開長平四二合庫平查長平
與漢口估平無異估平合庫平亦有合四二者然卑局
向來解釐課發商本之庫平銀均以漢平四二六合成
則長平四二合庫平六十萬兩每百兩平內尙少六分
又其少銀三百六十兩應俟六十萬兩繳齊之後飭令
該商照庫平足色寶銀補繳解請核收經鹽政左宗棠
批准嗣於五月武震稟解經收新商賀全福等三月底

期找數長平估寶銀三萬七千一百九十五兩六錢六分四月底期長平寶二十二萬四千兩共計裝鞘一百二十六根二尾數嗣又續稟解經收四月半一期報銷銀十五萬七千兩計裝鞘七十六根又尾數一鞘均由鹽政札飭江甯布政使查核收兌

光緒八年八月鹽政左宗棠奏前奏楚皖各岸增復引額收繳票費另款儲備提撥接准部覆淮南新加各票照見在奏銷限期能否按輪銷竣不致奪舊商之利以便新商應令該督通盤籌畫再行奏明辦理此次究竟每票收費若干各商領票若干共收費銀若干原奏並未

聲敘無憑稽核等因伏查新加引票均係就向未復足
原額准添新票仍令新舊一律挨輪行銷並非額外加
增之引自無新舊之別察看見在情形實無搶跌賤售
之弊商情適然塵市如故但期引地速復銷路暢通則
新舊商人同受其益至所取票費本年春閒據商人賀
全福等三十四商請增復楚岸十五萬引商人伊厚堃
等八商請增復皖岸四萬二千八百五十八引商人厚
德昌等三十六商請增復淮北十六萬三千十八引商
人怡同興等二商請增平江專岸二千引臣體察商情
稽考成案實係舊額應復未復之引而歷前任暨言官

交章奏請禁川復淮規復舊額部臣議奏謂禁川復淮事屬復舊而非變法豈容以一時之利廢厯久之規又謂新商認捐每票數千兩舊商包餉每票不過千兩數之多寡既殊新商每票數千之捐剋期可集舊商每引二兩之餉卒歲以需時之遲速亦判但就目前款項計之舍舊謀新不免稍有失算等語臣愚以爲此次辦法本率舊章以裕課便民爲主所批賀全福等五百引爲一票每票暫定票費銀一萬兩旋據以利微求減遂批飭暫定爲五千先繳二千辦運一次察看獲利在二分以上則票費仍應加增儻獲利不及二分則票費仍准

酌減初次核定後姑准循環轉運其餘三千兩限年內
繳清以示限制商情異常踴躍卽由於此而舊商見新
章漸定已有妒心又因昔日每票一張可索價銀一萬
數千兩者今不過數千兩即可領獲一票舊票且無人
過問又正值臣整頓鹾務禁止夾帶重斤虛報淹消諸
弊遂不遺餘力設計傾軋以致謠諑紛起湖南尤盛臣
雖有所聞亦不便設法譏禁恐徒增擾累致傷政體皖
岸定每引繳票費銀十六兩該商屢稟請減未許亦飭
先繳五成餘均照賀全福章程辦理至淮北引鹽地近
獲利較微每引飭繳票銀二兩卽循環轉運數月以來

據賀全福等繳庫平銀六十萬兩伊厚堃等繳庫平銀三十五萬七千一百六十兩平江專岸繳庫平銀八千兩均經札發江甯藩司儲庫聽候提撥惟該商等係陸續繳呈期票賀全福見尚有期票二萬兩未經兌銀伊厚堃亦有數萬兩係七月底期見尚未經兌銀前因票費既未畫定而銀兩亦未到期繳清故無從明晰聲敘具奏惟厚德昌應繳庫平銀三十二萬六千二十六兩業經繳清發運司存庫以上見共繳存藩運各庫銀一百二十九萬一千一百九十六兩其福慶祥等請楚岸衡永寶之引見雖務尙無定章心存疑慮尙未繳銀應

暫置勿論又商人盛世豐等八商請認湖南辰州專岸
一萬二千引商人積善祥等請認湖南永綏苗疆專岸
一千七百十二引或意存壟斷或延不繳捐均飭一併
撤銷奉

旨戶部議奏欽此旋於是年九月戶部議覆前因左宗棠增
足各岸引額未敢輕於議准旋據御史李暎奏稱淮南
增引請以每票萬金之數加引三萬明定限制臣部見
其持論頗中肯綮議令左宗棠復加體察在案茲左宗
棠以增足引額收繳票費銀兩各數具奏前來臣等詳
加察核據稱舊商每票一張可索價一萬數千兩此次

左宗棠原批賀全福等五百引爲一票定票費銀一萬兩辦法實爲公允旋以商人求減復批飭暫定爲五千又准其先繳二千辦運一次是新商二千兩之本與舊商一萬數千兩之本同一輪銷無怪新商則異常踴躍舊商則謠諑紛起也據彭玉麟奏稱廣西候補知府張崇澍買票充商向長沙饒泰和錢鋪轉借銀六十萬兩匯兌來江捏報賀全福等商名請運湘鄂引鹽三百票每票銀五千兩設法鑽謀希圖掣票到手招搖加價賣票與人不須運鹽行銷本利先已俱獲然後交清票銀歸還錢鋪彼收無本之利等語是所謂新商者尙在不

知誰何之數將來輒轉冒充弊端百出不但無裨帑項
且恐於淮鹾大局有妨臣等公同商酌淮南舊商票價
每張既值銀一萬數千兩見在議加新票自應以左宗
棠原定一萬兩爲准惟鄂湘引地尙未全行規復若驟
加三百票合十五萬引其不能按輪銷竣可想而知與
其徒有加引之名未收裕課之實不若由漸而來期於
國課商情兩有裨益查近來湖南北銷數每年約在二十
餘萬引上下旣據左宗棠奏稱賀全福等三十四商已
繳銀六十萬兩應准加票六十張合三萬引酌量鄂湘
兩岸情形均勻配搭准其與舊商一體按輪運銷此後

川銷漸減淮銷自當漸暢運務必不致遽形壅滯儻新商不願承領應令舊商認繳銀六十萬兩發還新商所加新票六十張卽准舊商領運將來由減川而馴至禁川應由左宗棠隨時酌核銷數次第請加仍援照此次定章辦理至皖岸請增四萬二千八百五十八引是否不致滯銷每引收費銀十六兩比較舊商票價是否不致懸殊臣部礙難臆揣應仍令左宗棠體察情形如果銷數暢旺加引不嫌過驟票價相等新舊無慮偏枯自可照議辦理惟仍須繳足全數方准領運行銷與楚岸一律據稱伊厚堃等八商已繳銀三十五萬七千一百

六十兩應卽將已收銀兩按全費核計銀數先准各商承領與舊商一體按輪運銷如新商不願亦令舊商認費領運其平江請增二千引計票四張以鄂湘見定票費計算應繳費銀四萬兩據稱見繳銀八千兩尙不敷一票之數並令查照此次議定章程卽飭新商補繳足數以歸畫一以上淮南北及皖岸所收票費銀一百二十九萬一千一百九十餘兩應於提撥應用時報部查核新加之票應自光緒九年起查照淮南接上下半年奏報向章另案先行開單奏報並將兩淮新舊各商課釐收支各款亦自明年起分款造冊報銷以憑核題奉

旨依議欽此

光緒八年十月鹽政左宗棠札運司等前准部文令將鄂
湘新增之十五萬引減爲三萬引查賀全福等初次應
繳報效除尾數二萬兩外餘早全數繳清見在新引已
運者業逾三萬礙難遵辦擬減爲六萬數千引分別已
運未運辦理該商等每票已繳票費二千兩其鹽已起
運者其銀未便給還以此次行文之日截數約計已運
三萬數千引儘此一次而止其鹽未起運者以三萬引
爲限給予循環仍歸新商自行酌度願領循環者以前
發收照湊成一萬兩換給五百引循環執照一張不願

領循環者繳呈收照卽將已繳票費二千兩發還照章另招補數如此則有力承運之商以後引少利饒票價必長卽每票費銀萬金較之舊價每票一萬數千兩尙屬便宜無力承運之商前繳票費旣准收回則由借貸而來者今得原璧歸償商情亦順而於部文減引加費之義尙不相背所有循環三萬引以二萬引運鄂一萬引運湘於岸銷不至占滯至皖岸本年夏間水災銷滯與春間加引時情形不同前增之三百五十餘票似難周轉應照部議就已繳之三十五萬七千一百六十兩按全數計引仿照鄂湘每引收票費二十兩尙不喫重

應給運一萬七千八百五十八引除零合一百四十八
票以一百票運北鹽四十八票運南鹽准其一律循環
另給印票收報其楚皖循環新引均自光緒九年正月
起運札到該司等卽便傳諭該商等遵照

光緒八年十二月鹽政左宗棠批商人賀全福稟請退票
一案查此案已據運司具詳批准該商等退稟歸和致
祥等繳捐承認至前加運三十五票尙未據運司鄂局
復到應俟稟復酌核飭遵

光緒八年十二月商人賀全福稟竊商於春間繳銀辦運
冬間部文准循環六十票是商本應於本年先辦六十

票和致祥從明年正月起自是接辦第二次循環今商
已起咨祇八十五票似應再運三十五票合成百二十
票方與憲札定爲六萬數千引三萬數千引祇辦一次
三萬引永遠循環之文相合於憲臺原批三百票實已
核減一百八十票未准辦運此次之請運三十五票實
出萬不得已又查同治初年鹽票本無循環其辦運一
次者除呈繳預釐外並無票費憲臺已於四月奏明在
案皖岸之有報效係爲循環而捐本年皖岸循環新商
亦蒙恩免卽和致祥繳捐認票亦係循環實無一次須
繳二千之事部文原議將六十萬發還亦無已辦運者

外加票費之語頃聞運司已代商等乞恩免扣票費二
千足見商之苦衷運司亦經洞悉見在情迫事急不得
不再懇恩憲格外矜全將免扣二千加運三十五票明
白批示通行司局生生世世永沐鴻施經鹽政左宗棠
批查部文祇准以十五萬引減爲三萬引而接文時該
商等請咨已逾三萬引之額若照部文核減則該商等
更不得了是以將已運之鹽准作一次每票收票費二
千兩應給循環三萬引尙須據實具奏至同治初年票
未值錢自無票費名目見在鄂湘票價已由部定每票
一萬兩與初行票時情形迥乎不同未便免繳昨已札

飭鄂局將已運一次每票票費二千兩核數扣解又前項已經起咨之鹽前經札司以接到本爵閣部堂札文之日截數淮南局自係遵札辦理尚有六票旣未收價儘可截停惟在鄂局所繳預釐應行發還所請加運三十五票更無庸議

光緒九年正月商人賀全福稟票費一節雖蒙恩減一千實有不能謹遵之苦伏思輸捐請引本謹遵部文名正言順不料覬覦者妄肆詆誣商非奉身以退阜白終莫能分是以去年情願退歸和致祥承運雖經津貼三萬餘金係原捐平色在內商所繳捐項皆係公籌卽如饒

泰和所分之票其已運之鹽久爲各債主挽扣今年憲批發還之銀仍照原出之數商自不敢少其分毫此外各商祇知向商索還原銀並不過問票價之事若扣去八九萬金商實無力賠繳泰和既不能扣事同一律尙有何人肯出似此無窮訟累商力難支見在和商捐內歸商領者名曰二十一萬有奇其實得入己者實不敷去年虧空查舊商之票通計二十年來並已得獎敘者祇捐過一千五六百兩去年照憲定五千之數已繳六十萬金應辦一百二十票今祇運八十五票實未足數部文重在循環運一次者並未議及所謂自九年正月

起運係指循環而言實無已運者於萬金之外另收票費淮南每年兩次報部祇計引數統報向不分鹽票名色商鹽同一完釐納課與老票並無分別戶部但計引數有何新舊之分今日老商之票鹽銷則納釐課未銷並不賠完非昔日包完釐課之商可比也至如已經起咨之六票十月內卽雇船隻二十餘號水腳陸續付訖去冬坐守三月其水手二百餘人火食工價均由商貼此時若無鹽裝水腳等項勢無可退是商於此六票虧折又近萬金爲此稟乞免扣前繳票費銀兩以甦商困經鹽政左宗棠批所請免扣票費銀兩仰淮運司卽日

議詳嗣於五月運司孫翼謀詳查此項已運票費前經
奉准每票捐繳銀一千兩該商等前因請增新引湊繳
票費爲數甚鉅爲時又久月息匯費虧耗殊多所稟苦
累情形尙非虛飾且已運之七十九票奏明祇運一次
爲止與永遠循環者情形迥乎不同所有應完課釐等
項均照章呈繳亦無短絀其已運之七十九票可否每
票再減銀五百兩出自憲恩經鹽政左宗棠批准嗣於
四月湖北督銷局程桓生稟據賀全福稟已運之票初
蒙免扣一千兩續蒙再免扣五百兩查上年原認三百
票繳捐六十萬奉部核准六十票蒙奏明已運之七十

九票祇准運一次爲止以後卽歸和致祥環運向章舊
票更名卽歸更替之商承運不聞向退商扣捐今商上
年所繳之捐辦運一次以後歸和致祥環運事同一律
不過溢運十九票耳商以數十萬鉅資在庫一年之久
月息有費匯兌有費在棧在途在揚在漢在湘亦莫不
有費今日一舉而空綜計十九票之餘利萬不能敷耗
折之繁多本年奏案已運七十九票並無扣捐之文懇
乞轉稟准將已運各票一體全免等情到局復查此項
票捐本在六十萬兩之內因准環運而始飭捐其不能
環運之票祇准一次該商等但知按和致祥等已經代

繳遂未計及一次之票仍須另捐目下賀全福等應領
之款均已遵札發清亦實無力報繳伏乞將每票五百
兩淮予全免經鹽政左宗棠批准咨部核辦

光緒九年二月鹽政左宗棠奏竊淮南引鹽前經臣奏加
鄂湘新票十五萬引原以稽諸舊額短缺前數十年來
未經規復而新商踴躍爭先捐輸巨款又於

國計不無裨益是以一面奏請加額一面咨商川楚兩省
將久假未歸之引地一律歸還川楚督臣如果不分畛
域復准淮引地助淮緝私前次准加之十五萬引暢銷於
荆宜五府一州淮課由此充盈商竈由此繁富乾隆嘉

慶之盛規未始不可復覩於今日乃四川督臣丁寶楨
僅允每月減讓一二百引尙屬空言並非實事湖廣督
臣涂宗瀛一意袒護川鹽爭斷不致少之餉項忘必不
可廢之成規以致引地絲毫未復新鹽無路拓銷商情
畏阻上煩

宸廑其咎固不在增引之驟而在復岸之難也明矣接准部
咨以引地未能全復遽加三百票恐不能按輪銷竣不
若由漸而來新商已繳銀六十萬兩應准加票六十張
黨新商不願承領應令舊商認繳銀六十萬兩發還新
商等語是臣辦理掣肘情形部臣亦已洞悉茲據兩淮

運司孫翼謀署淮揚海道徐文達具詳新商賀全福等
三十四商以十五萬引減爲三萬引每票繳票費一萬
眾商意見參差無力承運稟請退票由司另招殷商和
致祥等循環三萬引以二萬引歸鄂一萬引歸湘分別
綱分挨次給運是舊引既不能占礙新票可按輪售銷
商情帖服眾論翕然核與部臣收銀六十萬加票六十
張之議適相符合而賀全福之票旣經退出從前之謠
諑紛紜亦已不煩辯論而自解矣惟賀全福等前次繳
捐後經臣

奏明一面收銀一面辦運且恐引地一復到處需鹽長江

路遠故飭先行起運此次接到部文臣比飭運司於奉
文日截數據報運出鹽七十九票合三萬九千五百引
已運之鹽有到岸銷訖者有旱經開江者均祇准一次
爲止此後歸和致祥循環轉運所有鄂湘另招新商發
給循環三萬引緣由理合恭摺覆陳

光緒九年十一月運司孫翼謀湖北督銷局道員程桓生
詳奉憲臺札部咨飭將淮南多運之十九票票費會議
核辦等因本司道遵飭該商賀全福等妥議去後茲據
該商等稟稱上年捐銀六十萬兩雖與和致祥捐項抵
領而年餘之月息將及十萬金揚漢湘三處坐號各府

縣十餘處子店房租倉租夥友辛工火食酬應所耗甚
鉅和致祥津貼銀三萬六千兩已全給饒智元領收稟
報有案商等所運一次之票餘利無幾萬難彌補虧耗
見在變賣家產猶不能敷已銷之鹽早經債主收去未
銷之鹽亦皆質抵與人勢敗家傾實無力再籌十九票
之捐費請仍照前次批定之案概予全免等情本司道
查承項新票應給還賀全福銀兩早經發給見已無可
核扣且此十九票祇運一次不准循環捐既難以統同
票亦無從分別核計鹽釐售出可收六萬餘金伏乞俯
念一運卽停准予全免實出憲恩經鹽政左宗棠批仰

候據情咨部俟部覆飭遵

光緒十年二月戶部咨查淮南鄂湘新加引票據兩江總督聲稱新商已報運出鹽七十九票當經本部以淮南新加之三萬引計六十票其多運之十九票票費是否存儲在庫查明登覆等因在案茲據該督咨稱該商等所領之票祇運一次無力再籌十九票捐費可否准予全免咨部核覆等語查此項多運十九票應繳票費爲數甚鉅所請准予全免之處款項攸關未便據咨率准相應飛咨兩江總督卽自行專摺奏明應俟具奏到日再行酌核辦理

光緒十年九月鹽政曾國荃片奏再淮南前次加引案內
准給循環新引六十票接准部文行司截數計已多運
十九票祇准運鹽一次咨准部查十九票票費是否存
儲在庫經前督臣左宗棠札飭運司督銷局諭商稟覆
所運一次之鹽餘利無幾難補虧耗無力再籌票費詳
經咨部概予全免旋准部覆未便據咨率准令卽自行
專摺奏明等因經臣復飭運司會局確查去後茲據該
司等會詳前項多運之十九票祇准領運一次與循環
轉運者情形迥別獲利甚微委實無力籌捐票費請照
前案奏請免繳前來臣覆核無異理合附片具陳奉

旨戶部知道欽此

謹按曾國藩新章楚岸每年定行五百四十八票每
票五百引每引六百斤計鹽二十七萬四千引內鄂
岸二百六十票爲引十三萬道湘岸二百八十八票
爲引十四萬四千道自左宗棠請加十五萬引以十
一萬引歸鄂岸四萬引歸湘岸嗣經戶部議定僅准
加六十票計增引三萬道以二萬引歸鄂一萬引歸
湘見行章程楚岸共六百八票爲引三十萬四千內
鄂岸三百票爲引十五萬道湘岸三百八票爲引十
五萬四千道然鄂湘兩岸歲銷實數均不過十一萬

引上下計三年僅銷兩年之票以引地難復故增引
未見其利也

兩淮鹽法志卷九十一

督銷司 南北加引上

三